

Rau To Paulus Imbooda Ila To Timoti Muuŋ

1 Timoti

1 ¹You Paulus, mbaŋooŋa to Yesu Krisi. Maaron to Volaanŋa toit, ve Yesu Krisi to tanumeera ve taghurghur mataad pani ne, yesuru to tisaav arianaŋa payou tighaze naghama uraat tonene.^a

²Timoti, nambood rau tonene ilat tiom pasa, ghurla toit ilup ghiit tanim ee moghon, ve naghita ghom utaghon katin ŋgar tiou unumale taug natug.^b

Poia to Tamaan Maaron yesuru Tiina toit Yesu Krisi iza tiom, ve lolodi isamin ghom, ve tiŋgin ghom uneeŋ pooi toman lolom luuma. Onoon.

Paulus ipariaanŋ Timoti ighaze itatan yes ndiran kaaromŋa

³Sawa to naghaze napul ghom ve nala pa taan suruvu to Masedonia, you nasaav arianaŋa payom naghaze uneeŋ izi ndug Epesus, ve usaav arianaŋa pa yes ndiran kaaromŋa pida, lesu tighamun ŋgar to tamtoghon muul sob. Ndiran tonanan, saveeŋ todi raraate pa saveeŋ to Krisi to iit tapatoot tamtoghon pani ne maau. Ve aazne, nasaav payom muul, lesu matam iŋgal uraat tiom tonanan ve ughami.^c

⁴Ndiran tonanan, moghon moghon tiyouyou avodi pa vuvuaanŋ soroksorok katindi to titaghon pitiinŋ to yes Yuda. Tovenen usaav arianaŋa padi, lesu tipul ŋgar todi tonowen ineep. Pasa, saveeŋ tovene, nene igham tamtoghon tiwazoran di pa mbab soroksorok to le anona maau. Irau ipamundigin di pa tighur ila to Maaron, ve tigham uraat itaghon ŋgar toni ne maau.^d

⁵Pughu to naghaze usaav arianaŋa pa ndiran tonanan, nene vene: You naghaze ŋgar ngalaanŋa moghon ineep ila tamtoghon to Krisi lolodi, ve tiyamaan taudi tighaze ŋgar todi isob, nene poia moghon ila Maaron

a 1:1 2Kor 1:1; Ga 1:1 **b** 1:2 Mbaŋ 16:1+; Tit 1:4 **c** 1:3 1Tim 6:3+ **d** 1:4 1Tim 4:7; 2Tim 2:14+; Tit 1:14

mata, ve tighur ila to Krisi toman lolodi. Leso titaghon ngar to lolood pa tamtoghon.^e

⁶Eemoghon tamtoghon toit pida tipul muridi pa ngar tovene wa. Tauto tiyel pa ataam to Maaron, ve tiyouyou avodi pa saveen soroksorok. ⁷Ndiran tonowen lolodi tighaze le tipatoot tamtoghon pa tutuun to Maaron. Ve tinumeer tighaze yes tiwatag katin saveen to Maaron pughu. Eemoghon ngar to tisavsaav ariana pani, taudi tighazoon pani maau. Maau kat. Avodi burburia sorok.

Uraat tau to tutuun

⁸Iit tawatag: Tutuun to Maaron, nene mbep poia. Eemoghon iit irau tapatoot tamtoghon pani itaghon Maaron ngar toni.^f

⁹Pasa, Maaron ighur tutuun pa ipasalungan tamtoghon dejadi maau. Tutuun toni injarua yes to timamalaan pa tutuun ve tizoor Maaron aliya, ve yes to matadi injal Maaron maau ve tinoknok ghamuun ngar samia, ve yes to tiroron pa mbep patabuan maau ve tighamgham ngar pa mbep to taan moghon, ve yes to tirab nditamandi ve nditinandi, ve yes to tirab tamtoghon timaat.^g

¹⁰Ve tutuun toni injarua yes to tighurghur maat, ve yes nditamoot to timomogheer pa nditadi nditamoot, yes to tigholia tamtoghon lesa tinim mbesoonja sorok, ndiran kaaromja, ve yes to tipariaan saveen kaarom, ma tigham ngar ite paam pa tizoor saveen onoon to igham lupuun to Krisi ilaan poia.^h

¹¹Saveen onoon tonowen ineep ila varu poia to Maaron ighuri inim nimag, lesa navotia pa tamtoghon. Varu poia tonene ipaghazonan ghiit pa Maaron ighaze ye poia pughu. Iza tiina kat pa tapiri ve poia toni. Tauto tapaiti irau sawa isob.ⁱ

Paulus lolo poia kat pasa, Yesu Krisi ireu sosor toni, ve ighuri inim uraata toni

¹²You lolog poia kat, ve napait Tiina toit Yesu Krisi. Pasa, ye inumeer ghou ighaze you pale nanjin poian uraata toni. Tauto ighur ghou nanim uraata toni, ve ighur tapiri iza tiou.^j

¹³Onoon, muun you napiyaav saveen samsamia naol pani, ve naghur patajani naol pa tamtoghon toni, ve nawaghamun di le naghodi isami. Pasa, sawa tonenen, you nakankaan pani, ve naghur ila toni maau. Pughu tonene, to Tiina toit Yesu Krisi lolo isamin ghou, ve ireu sosor tiou. ¹⁴Ye ighur poia toni tiina kat iza tiou, ve

e 1:5 Mk 12:30+; Ro 12:9; 2Tim 2:22 **f** 1:8 Ro 7:12 **g** 1:9 Igham 21:12,15; Ga 3:19
h 1:10 Ro 7:7; 1Tim 6:3; 2Tim 4:3; Tit 1:9 **i** 1:11 2Kor 4:4 **j** 1:12 Mban 9:15

igham ghou naneep tunja ila toni. Tauto aazne, naghur ila toni, ve lolog pani kat, ve lolog pa tamtoohon paam.^k

¹⁵Yesu Krisi izi inim taan pa igham mulin iit tamtoohon samsamiaad pa pataņani to sosor toit. Saveeņ tonene, onoon kat. Irau taghur ila, ve takisi ineep ariana ila lolood. Ve you nalib kat pa tamtoohon tisob pa ghamuun sosor.^l

¹⁶Eemoghon poia to Yesu Krisi to iza tiou, nene tiina le tiina kat. Aghita. Ye lolo isamin ghou ve ipul sosor tiou, lesu nanim patoņa pa tamtoohon to muri, ve tighilaal tighaze Krisi, ye ngeu to ate waro iit tamtoohon ve lolo isamin ghiit. Ve tighur ila toni, ve tigham nepooņ poia ila to Maaron. Nepooņ tonowen iseņga itaghoni taghoni gha ila.

¹⁷Maaron toit, ye kinik tiina, ve ineep irau sawa isob.

Ye irau imaat maau, ve iit irau taghita pa mataad maau.

Ye moghon to Maaron tau.

Tovenen iit irau tapait iza pa tapiri ve poia toni, to aazne, ve iseņseņga gha ila.^m

Paulus ipalot Timoti, lesu iyoon ariana

¹⁸Tovenen natug Timoti, usaav ariana pa ndiran kaaromņa tonanan. You matag iņgal: Muuņ, Maaron Avuvu ipamundigin tamtoohon pida ve tivotia mbep pida to muri pale tivot payom. Uraat to naghuri payom, nene denja pa saveeņ todi tonowen. Tovenen matam kisin saveeņ todi. Leso ipalot ghom, ve uparab ariana pa saveeņ onoon, ve utatan saveeņ to ndiran kaaromņa tonanan.

¹⁹Ve ukis ghurla tiom tunja, ve utaghon ngar to uwatagi ila lolom ughaze nene poia ila Maaron mata. Pasa, ndiran pida, yes tipul muridi pa ngar tovene wa. Tauto ghurla todi isami le tinim waņ to ilot izala maghat ve imbiris.ⁿ

²⁰Ndiran tonowen, todi ru, nene Himenaios yesuru Aleksander. You nazurun di pa lupuuņ to Krisi, ve naghur di tineep ila Sadan nima wa. Naghaze napasalungan di ve tighilaal, lesu tiveleg Maaron muul sob.^o

Taghur tamtoohon tisob ila suņuuņ toit

2 ¹⁻²Yo. mbep tiina to naghaze napalot gham pani muuņ, nene vene: Yam irau aghur tamtoohon tisob ila suņuuņ tiam. Asuņ pa Maaron toman lolomim poia pani, ve aghasoni pa iuul di ve igham pooz padi. Aghur yes kinik toman daba tisob to taneep ila sambadi ne, ila suņuuņ tiam. Leso pataņani indeeņ ghiit sob, ve taneep poia toman lolood luuma, ve mataad iņgal Maaron ve tataghon ngar toni, ve taņgin tauud pooi tanimale yes to ledi ngar pa Maaron.^p

k 1:14 Mbaņ 8:3, 9:1+; 1Kor 15:9+ l 1:15 Mt 1:21; Mk 2:17; Lu 19:10 m 1:17 1Tim 6:15+; Syg 4:9+ n 1:19 1Tim 3:9, 6:12 o 1:20 1Kor 5:5; 2Tim 2:17+, 4:14+ p 2:1-2 Ro 13:1; Ep 6:18; Pil 4:6

³Sunjuunj tovene, nene poia ila Maaron to Volaaŋa toit ne mata, ve ighami lolo poia. ⁴Pasa, ye ighaze igham mulin tamtoghon tisob, ve igham di tiwatag katin saveeŋ onoon.^q

⁵⁻⁶Iit tawatag:

Maaron ee moghon to inepneep.

Ve Ŋgeu ee moghon to iyoon bodbodaan pa Maaron ve iit

tamtoghon, ve ilup ghiit tanim ee moghon. Nene Yesu Krisi.^r

Ye izi inim taan ve inim tamtoghon, ve iyokia tau ve imaat pa iit tasob.

Tauto ighol sosor toit atia,

ve ipas ghiit tavot pa samia tapiri.

Mbeb tonenen ivot ila sawa to Maaron tau ighuri, ve ipariaan ghiit pa taghur ila saveeŋ toni.^s

⁷Maaron ighur ghou nanim mbaŋoŋa toni, ve ighur uraat inim nimag ighaze navotia saveeŋ tonene pa tamtoghon. (Saveeŋ tiou tonene, kaarom maau. Onoon moghon.) Tauto napatoot yes to Yuda maau ne pa Maaron aliŋa, leso tiwatag katin saveeŋ onoon, ve tighur ila to Yesu Krisi toman lolodi.^t

Ŋgar to nditamoot irau titaghoni ila sawa to sunjuunj

⁸You naghaze yam nditamoot to ndug to naol ne ataghon ŋgar tovene: Sawa to alup gham pa sunjuunj, yes nditamoot irau tigharaat taudi le tiŋgalaan ila Maaron mata, ghoru tiit nimadi ve tisuŋ ila ival tiina matadi. Ve ŋgeu to ighaze ate yabyab soroksorok, ma izarzoor saveeŋ, nene ye irau ipul ŋgar toni tonenen ineep, ghoru iit nima ve isuŋ.^u

Saveeŋ iŋarua yes ndiliva

⁹You leg saveeŋ pida to iŋarua yes ndiliva paam. Yes tigham ŋgar to ndiliva nasolo malep. Tovenen yes irau tighur nonogiiŋa to poia ila tamtoghon matadi ve ŋgar todi. Ve timbuul dabadi raua ma tipiraii, ma tighur nonogiiŋa to atiadi tintina, ma titiik di pa gol ma mbaliin pida malep.^v

¹⁰Pasa, ndiliva to tisaav tighaze yes tiroron pa Maaron ve titaghon ŋgar toni, nene ŋgar popoia to tighamgham di, tauto tinim tikoŋj padi.^w

¹¹Ighaze alup gham pa sunjuunj, yes ndiliva irau tineep ila yes ŋginiinŋa sambadi, ve neneenadi, tighur taliŋadi pa Maaron saveeŋ toni, ve tigham ŋgar pani pooi.^x

¹²You nanŋalsekin yes ndiliva pa uraat to patoŋaan tamtoghon pa Maaron aliŋa. Ve titooa pa titatan nditamoot ve tinim daba padi malep.

q 2:4 Yo 3:16+; 1Tim 4:10 **r** 2:5-6 1Kor 8:4+; Ga 4:4+; Hib 9:15 **s** 2:5-6 Mk 10:45;
Ep 1:7+ **t** 2:7 Ga 1:16, 2:7+; Ep 3:7+; 2Tim 1:11 **u** 2:8 Mbo 134:2; Mt 5:23+
v 2:9 1Pe 3:3+ **w** 2:10 1Tim 5:10 **x** 2:11 1Kor 14:34+

Yes irau neneɗadi moghon, ve tighur taliɗadi pa saveeɗ. ¹³⁻¹⁴Saveeɗ tiou tonene, pughu tovene: Maaron ighur Adam muuɗ, ghoru ighur Eva. Ve Ɗgeu Samia ila to Adam ve itombaana maau. Ye ila to liva ve itombaana. Tauto ye itap, ve imalaan pa tutuuɗ to Maaron.^y

¹⁵Eemoghon yes ndiliva to tivai ve tipoop, ighaze tikis ghurla todi ariana, toman ngar to lolood pa tamtoɗhon, ve titaghon ngar patabuan, ve tiɗgin taudi pooi, nene pale Maaron igham mulin di ve tineep pooi.

Saveeɗ iɗarua yes to timuuɗ pa uraat to nginiin lupuuɗ to Krisi

3 ¹Ighaze ngeu eta lolo ipazaagha ighaze imuuɗ pa uraat to nginiin lupuuɗ to Krisi, nene poia. Uraat to ye ighaze ighami, nene uraat poia ve uraat tau. Saveeɗ tonene, nene onoon moghon. Irau taghur ila kat.^z

²Tamtoɗhon to ighaze imuuɗ pa uraat to nginiin lupuuɗ to Krisi, laghoon toni isob irau deɗia moghon, leso tamtoɗhon tiyou avodi pani sob. Tovenen mata ila pa liva ite paam malep. Ye irau mata kisin tau azuwa moghon. Ve irau lolo ipazaagha rikia maau. Ighaze lolo ighur pa ghamuuɗ mbab eta, ye irau ate imaat ve ingabiiz pooi. Le isob, ghoru ighami. Ve varu isami malep, ve ingin tau pooi, ve mata ghamuuɗ yes loomba. Ve ye irau le ngar pa uraat to patoɗaan tamtoɗhon pa Maaron aliɗa.^a

³Ve irau ighun le isami maau. Ve ate ipazaagha pa ghamuuɗ malmal ne maau. Ye irau igham pooi pa tamtoɗhon ve itaghon ngar luuma. Ve irau izorzoor saveeɗ, ma lolo igham pa le yaam ne maau.^b

⁴Ve irau ingin poian yes to tineep tomani ila ruum toni. Ve ipatoon ndinatu pooi, le tineep ila samba ve titandag pani. ⁵Pasa, ighaze ngeu eta irau ingin poian yes to tineep tomani ila ruum toni maau, nene pale ingin lupuuɗ to Maaron vena?

⁶Tamtoɗhon to ngaramus itoor ngar toni ve ighur ila to Krisi, ye irau imuuɗ pa uraat to nginiin lupuuɗ to Krisi maau. Pa vene, ipakur tau pa uraat tonenen, ve Maaron ighur atia pani inimale muuɗ igham pa Ɗgeu Samia.

⁷Ɗgeu to imuuɗ pa uraat to nginiin lupuuɗ to Krisi, ye irau itaghon ngar poia ila yes to tineep pumuri pa lupuuɗ to Krisi ne matadi paam, ve tipait varu. Pa vene, ye itap ve igham sosor, ghoru tamtoɗhon tiyou avodi pani, ve liis to Sadan iliisa.^c

Saveeɗ iɗarua uraata pida to lupuuɗ to Krisi

⁸Yes pida to tiuluul uraat to lupuuɗ to Krisi, tovene paam. Yes irau atedi imaat ve tiɗgin taudi pooi tinimale yes to ledi ngar pa Maaron. Leso

y **2:13-14** Mbnp 2:21+, 3:1+; 1Kor 11:8+ z **3:1** Mbaɗ 20:28 a **3:2** Tit 1:6+
b **3:3** 1Tim 6:9+; 2Tim 2:24 c **3:7** 2Kor 8:21; 1Tes 4:12

tamtoghon titandag padi. Tovenen yes irau tisavia saveeŋ onoon moghon. Yamadi itortoor saveeŋ malep. Ve matadi ghunuun malep. Ve ŋgar todi iyaryaŋ pa youŋ ledi yaam malep. Pasa, ŋgar tovene pale igham mayanjiŋa pa lupuuŋ to Krisi.^d

⁹Yes irau titaghon ŋgar to tiyamaana ila lolodi tighaze nene ingalaan moghon ila Maaron mata. Ve tikis saveeŋ onoon to iit taghur ila ne tunia. Saveeŋ tonenen, muuŋ iyoouŋ. Ve aazne ivot ighazooŋ wa. ¹⁰Tovenen yam aghur sorokin tamtoghon tinim uraata pa lupuuŋ to Krisi malep. Aghita yes to ledi sosor eta maau, ve atoov di le ighaze tiraua, ghoror aghur di.^e

¹¹Yes uraata ndizwadi^f tovene paam. Irau atedi imaate ve tinŋin taudi pooi tinimale yes to ledi ŋgar pa Maaron. Leso tamtoghon titandag padi. Ve irau lolodi ipazaagh di rikia maau, ve tinŋal saveeŋ pa nditadi maau. Yes irau tisavia saveeŋ onoon moghon, ve tinidi imbees pa uraate tisob to tighur di tila nimadi.^g

¹²Yes uraata to tiuluul lupuuŋ to Krisi, irau matadi kisin taudi ndizwadi moghon. Matadi ila pa ndiliva pida malep. Ve yes irau tinŋin poian ndizwadi toman ndinatudi, ve tamtoghon pida to tineep toman di ila ruum todi. ¹³Yes uraata to tinidi imbees pa uraate todi, nene pale varudi poia. Ve Maaron tau pale ipariaan di. Leso timatughez sob, ve tighur ila to Yesu Krisi kat, ve tiyoon ariana pa votiaan Maaron aliŋa.^h

Maaron ŋgar toni le pughu tiina

¹⁴⁻¹⁵Timoti, you naghaze natal rikia moghon ve naghita ghom. Eemoghon nambood saveeŋ tonene ilat tiom, pa ighaze mbeb eta ikis ghou ve irau natal rikia maau, nene aliŋag tonene pale ipatoon ghom pa ŋgar to iit tamtoghon to Maaron irau tataghoŋi. Iit to taneep ila lupuuŋ to Maaron mata yaryaara ne, tanim gungun ariana pa rumai toni lesor tapalot saveeŋ onoon. Ve tanim didiin ariana pa saveeŋ onoon, ve taponpoona pa koia.ⁱ

¹⁶Ŋgar to Maaron to iit tataghoŋi, muuŋ iyoouŋ. Ve aazne, ivot ighazooŋ wa. Ŋgar tonowen, ival tiina tiyok tighaze nene pughu tiina kat. Pasa, isavia Krisi tovene:

Ye ivot izi taan, ve inim tamtoghon raraate inimale iit.

Sawa to Maaron Avuvu ipamundigini pa mateeŋ, nene ipatoonŋa ighaze ye ŋgeu denja.

Yes aŋela tighita.

Tamtoghon tivotia varu irau ndug ndug to Yuda maau.

Ve tamtoghon to tineep irau taan ne, tighur ila toni.

d 3:8 Mbaŋ 6:3 **e 3:10** 1Tim 5:22 **f 3:11** Ŋgara pida tighaze saveeŋ waoro tonene isavia yes uraata ndizwadi maau. Tighaze saveeŋ tonene iŋarua yes ndiliva to tiuluul uraate to lupuuŋ to Krisi. **g 3:11** Tit 2:3 **h 3:13** Mt 25:21; 1Tim 5:17 **i 3:14-15** Ep 2:19+

Tama Maaron ighami imuul iza ila pa sambam, ve ipatoonja ighaze ye iza tiina.^j

Paulus isavia ndiran kaaromnja ngar todi

4 ¹Avuvu Patabuanj isaav ghazoonja pait wa: Muri, avuvu samsamiadi pale titombaan tamtoghon ve tighamun ngar todi, leso tipul muridi pa saveej onoon to iit taghur ila ne, ve tighur taliñadi pa ngar kaarom naol ve titaghon di.^k

²Ndiran kaaromnja tonowen, ñgeu Samia igham di tinim le wa. Tauto tiyamaan sosor todi muul maau, ve tiparim taudi pa ghurla todi. ³Yes tingalsekin tamtoghon pa vaiuuj, ve ghaniinj aniiñ pida. Eemoghon aniiñ to naol ne, Maaron ighur di, leso iit to taghur ila toni ve tawatag saveej onoon ne, tagham di ve taghan di toman lolood poia pani.^l

⁴Mbeb tisob to Maaron ighur di, popoiadi moghon. Tovenen tazurun eta malep. Tagham di ve taghan di toman lolood poia pa Maaron.^m

⁵Pasa, saveej to Maaron toman suñuuj toit to izala aniiñ pogho, nene ighami inim mbeb patabuanj to Maaron to poia pa ghaniinj.

Paulus ipalot Timoti, leso inim mbesoonja poia to Yesu Krisi

⁶O Timoti, saveej poia to iit taghur ila ne, tipatoot ghom pani ve utaghoni wa. Ighaze saveej tonenen ipalot ghom animale aniiñ poia, ve upaesia aliñag to ineep ila rau tonene pa yes tonvetaz to Krisi, nene pale unum mbesoonja poia to Yesu Krisi. ⁷Eemoghon saveej kaarom ve vuvuaanj soroksorok to tisasavia itaghon taan ngara, yom ughur taliñam pani rita malep. Matam ingal Maaron ve uzuaria ghom le utaghon katin ngar toni.ⁿ

⁸Ighaze tazuarua ghiit pa ghamuuj anoonaad tapiri ivot inim tiina, nene iuul ghiit ris moghon. Ve ighaze tazuarua ghiit pa taghoniinj ngar to Maaron, nene iuul ghiit kat. Pasa, iuul ghiit pa nepoonaad to aazne, ve nepoonaad to muri paam.^o

⁹Saveej tonene, nene onoon moghon. Irau taghur ila kat. ¹⁰Maaron mata yaryaara, ye iuluul tamtoghon tisob. Ve yes to tighur ila toni, ye inim Volaanja tau todi, ve igham mulin di. Iit taghurghur mataad pani ve nepoon poia to ye pale igham pait. Tauto tazuarua ghiit ve tagham katin uraat.^p

¹¹Saveej tiou isob tonene, upatoot tamtoghon pani, ve usaav arianja padi leso titaghoni. ¹²Onoon, yom ñgeu paghum. Eemoghon tamtoghon matadi izi payom malep. Yom irau unum patoonjaanj poia eez pa yes to

j **3:16** Yo 1:14; Mbanj 1:9; Ro 1:4; Ep 1:20, 3:6 k **4:1** Mt 24:23+; 2Pe 3:3; Jud 18
 l **4:3** Mbnp 9:3; Mk 7:19; 1Kor 10:30+; Hib 13:4 m **4:4** Ro 14:14; 1Kor 10:25 n **4:7** 1Tim 1:4, 6:20;
 2Tim 2:16,23 o **4:8** Mbo 84:11; Mt 6:33; 1Tim 6:6 p **4:10** 1Tim 2:4

tighur ila to Krisi. Saveeņ tiom toman gabuam isob irau denja moghon. Tovenen lolom pa tamtoghon ve ugham poian di, upatooņ ghurla tiom ivot ighazooņ, ve ugham ŋgar ŋgalaanja moghon. Leso tamtoghon tighita ŋgar to ughamghami, ve titaghon ghom.^q

¹³Sawa to usasaņan ghou, upul taum kat pa uraat tiom. Uwatwaat Maaron aliņa pa tamtoghon, upatoot di pani, ve upalat di pa titaghoni.

¹⁴Muuņ, sawa to yes ŋginiņa tighur nimadi izala poghom ve tighur ghom pa uraat, Avuvu Patabuaņ ipamundigin tamtoghon pida ve tivotia Maaron aliņa payom. Sawa tonenen, Maaron Avuvu irei tapiri ve ŋgar popoia pida payom, lesu upalat lupuuņ to Krisi pani. Tovenen umamalai pa uraat tiom malep. Tapiri ve ŋgar popoia to ineep tiom ne, matam iza pani ve ugham anoņa ivot.^r

¹⁵Ŋgar isob to nasavia di payom ila rau tonene, matam kisin di, ve utaghon katin di. Upul taum kat pa taghoniņ di. Leso tamtoghon tisob to matadi ilatlat tiom, tighilal ghom tighaze yom uzuaria ghom ila ila, le ŋgar tiom toman uraat tiom ivot kat. ¹⁶Tovenen matam imosmoos pooi pa taum, toman saveeņ to upatoot tamtoghon pani. Ighaze ukis ŋgar tovene, nene pale Maaron igham mulin ghom, ve yes to tiloņlooņ saveeņ tiom ne paam.^s

Ŋgar to iit irau tagham pa Maaron tamtoghon toni

5 ¹Matam iņgal. Ighaze upasalunģan tamtoghon pa ataam to Krisi, uņaar ndolman malep. Utandag padi, ve usavia saveeņ padi toman roroniņ, inimale usavsav pa taum tamam. Ve usaav pa ndipain papaghu inimale usavsav pa nditazim. ²Ve ndiliva ndolman, ugham ŋgar padi inimale ughamgham pa tinam. Ve yes ndiliva papaghu paam, ugham ŋgar ŋgalaanja moghon padi inimale ughamgham pa ndilivum.

Saveeņ pida to ijarua ndinaara

³Ndinaara to engendi kat, uroron padi, ve uņģin poian di. ⁴Eemoghon ighaze naar eta ndinatu ma nditimbu pida tinepneep, yes irau timuuņ pa ulaaņ naar tonenen. Pasa, yesņa siņ ee moghon. Leso tiyat mbesooņ to muuņ nditamandi ve nditinandi tigham padi, ve tipatooņ taudi tighaze yes titaghon ataam to Maaron. Ŋgar tovene, nene poia ila Maaron mata, ve ye ighita ighaze nene mbep tiina kat.^t

⁵Yes ndinaara to engendi kat ve ledi tamtoghon eta pa iuul di maau, nene tighurghur matadi pa Maaron moghon pa iuul di, ve tisunģsuņ pani irau mboņ ve ndag.^u

⁶Ve ighaze naar eta tini imbees pa nepooņ poia to taan moghon, onoon, ve ineep mata iyaryaar. Eemoghon ghurla toni, nene imaat wa.

q 4:12 1Kor 16:10+; Tit 2:7,15; 1Pe 5:3 r 4:14 1Tim 1:18; 2Tim 1:6 s 4:16 Mbarj 20:28
t 5:4 Mt 15:4+; Ep 6:1+; 1Tim 2:3 u 5:5 Lu 2:37

⁷Savej tiou tonene, yom irau usaav ariana pa tamtoghon pani. Leso laghoon to ndinaara toit denja moghon ila tamtoghon matadi, ve irau tiyou avodi padi maau.

⁸Ighaze tamtoghon eta ighaze ye ighur ila to Maaron, eemoghon iuluul tau sij toni ve yes to tineep tomani ila ruum toni maau, nene ye ipul muri pa ghurla toni wa. Nggar tovene, samia kat. Ilib pa sosor to yes to tighur ila to Maaron maau ne.^v

⁹Ighaze ugham nggar pa naar eta ughaze ughur iza ila rau to ulaan,^w yom irau ungabiiz poian nggar toni. Le isob, ghoru ughur iza ila rau, ve lupuun to Krisi tingini pa nepoon toni. Ughita yes ndinaara to ndaman todi irau tamoot tol ve izala. Ve muun, tighur maat maau, ve tineep pooi toman ndizwadi moghon. ¹⁰Ve varudi poia pa uraat popoia to tighami. Ve muun, tingin poian ndinatudi ve yes loomba. Ve titatan taudi, ve tinidi imbees pa uraat to ulaan Maaron tamtoghon toni,^x ve tiuluul yes to patajani indeen di, ve tipul taudi kat pa uraat popoia naol naol. Ndinaara tovene, ghoru ughur izadi ila rau to ulaan.^y

¹¹⁻¹²Eemoghon yes ndinaara to papaghudi, ughur izadi ila rau to ulaan malep. Pasa muri, ighaze lolodi igham pa vaiuun muul, nene pale tighur muridi pa Krisi, ve tireu saveen mbuaan todi, ve tisor ila Maaron mata. ¹³Ve mbep ite paam. Pale maatedi pa uraat, ve tirou irau ruum avo avo, ve tinin avodi pa tamtoghon, ve tisia ledi savaaveen to nditadi. Ve tisavia saveen pida paam to poia pa tasavia maau.^z

¹⁴Tovenen you naghama nggar naghaze yes ndinaara papaghudi tivai muul, ve tipoop, ve tingin poian taudi ruum todi, ghoru poia. Leso ledi sosor eta ila koiaadna matadi sob, ve irau tiyou avodi pait maau.^a

¹⁵Saveen tiou tonene, you nasavia sorok maau. Pasa, ndinaara pida, yes tipul ataam to Krisi, ve titaghon Sadan nggar toni wa.

¹⁶Ighaze liva eta ighur ila to Krisi, ve sij toni pida tinim ndinaara, ye irau iuul di. Leso tigham patajani pa lupuun to Krisi sob, ve lupuun irau iuul yes ndinaara to enjendi kat.

Nggar to lupuun to Krisi irau tigham pa yes nginiina

¹⁷Yes nginiina to tingin poian lupuun to Krisi, yam irau atandag padi ve agham ledi atia poia. Ve yes nginiina to tighamgham uraat tiina pa votiaan Maaron aliina ve tipatoot gham pani, ghoru atandag padi kat, ve agham ledi atia tiina ris.^b

v 5:8 Tit 1:16 **w 5:9** Ndiran nggara pida tighaze saveen waaro tonene injarua yes ndinaara to timbua saveen tighaze yes irau tivai muul maau, ve tigham uraat to Maaron moghon. Yes to timbua saveen tovene, tighur izadi ila rau to ulaan, lesu lupuun to Krisi tiuul di ve tingin di pa nepoon todi. **x 5:10** Saveen to Paulus imbooda, isaav tovene: "Yes timenmen Maaron tamtoghon toni aghedi." Saveen tonene injarua uraat naol naol to ulaan. **y 5:10** Lu 7:44; Yo 13:14; Hib 13:2; 1Pe 4:9 **z 5:13** 2Tes 3:11; Tit 2:3 **a 5:14** 1Kor 7:9 **b 5:17** Pil 2:29; 1Tes 5:12+; Hib 13:17

¹⁸Pasa, Maaron aliŋa to timbooda, isaav tovene:

“Bapolo to ivavazag wit tiom, yom upoon avo malep. Leso ighan a aniiŋ pida.”^c

Ve saveeŋ waaro ite isaav ighaze:

“Tamtoŋhon to ighaze igham uraat, ye irau igham le atia.”^d

¹⁹Ighaze tamtoŋhon ee moghon iŋgal saveeŋ pa ŋginiŋ eta, ulooŋa malep. Ve ighaze tamtoŋhon ru, ma tol tipariaaŋ saveeŋ raraate, ghoru ulooŋ di.^e

²⁰Yes ŋginiŋa to tinoknok ghamuunŋ sosor, uvotia sosor todi ila ival tiina matadi ve uyaan di. Leso yes pida tighita ve timatughez.^f

²¹Timoti, ila Maaron yesuru Natu Yesu Kriŋi, ve yes aŋela to Maaron ighur di pa uraat toni ne matadi, you nasaav arianaŋ payom tovene: Saveeŋ tiou isob tonene, matam kisini ve utaghoni kat. Yom irau ugham ŋgar raraate moghon pa tamtoŋhon tisob. Uvool to eta malep.^g

²²Ughur nimam izala tamtoŋhon poghodi ve ughur di tinim ŋginiŋa rikia malep. Ve ula toman tamtoŋhon pa sosor todi malep. Uŋgin taum pooi, lesu gabuam isob iŋgalaŋ ila Maaron mata.^h

²³You nawatag: Yom lem moroghoonŋ ineep ila apom, ve sawa naol ighamgham ghom. Tovenen yom irau ughun ya moghon maau. Ughun vaen ris paam, ghoru poia. Lesu iuul ghom.

²⁴Tamtoŋhon pida, ŋgar todi samsamia ineep ghazooŋa. Tovenen rikia moghon ve taghilaal di taghaze muri, Maaron pale ighur atia padi. Ve tamtoŋhon pida, ŋgar todi samsamia iyoonŋ. Eemoghon yes paam, muri pale tigham atia to ŋgar todi samsamia tonowen.ⁱ

²⁵Iŋgar popoia to tamtoŋhon tigham di, tovene paam. Pida tineep ghazooŋa. Ve pida maau. Eemoghon irau tiyoonŋ itaghoni taghoni gha ila ne maau. Muri pale tivot tighazooŋ.^j

Saveeŋ pida to iŋarua yes mbesooŋa

6 ¹Mbesooŋa tisob to tinim Kriŋi le wa, yes irau tineep ila daba todi sambadi, ve titandag padi ve tipakur di. Leso tamtoŋhon tiwaghmun Maaron toit iza sob, ve tiyou avodi pa saveeŋ to Kriŋi to iit tapatoot tamtoŋhon pani ne malep.^k

²Onoon, mbesooŋa to ighaze daba toni ighur ila to Kriŋi, nene yesuru toŋvetaz to Kriŋi. Eemoghon mbesooŋa tonenen mata izi pa daba toni malep. Ye irau itandag pani, ve tini imbees kat pa uraat to daba toni. Pasa, ye lolo pa daba toni, ve igham ŋgar ighaze uraat toni, nene iuluul ŋgeu to ighur ila to Kriŋi.^l

c 5:18 Lo 25:4; 1Kor 9:9+ **d 5:18** Lu 10:7 **e 5:19** Lo 19:15; Mt 18:16+ **f 5:20** Ep 5:11; Tit 1:13 **g 5:21** 1Tim 6:13 **h 5:22** Mbaŋ 6:6, 13:3; 1Tim 4:14; 2Tim 1:6 **i 5:24** Ga 5:19 **j 5:25** Mt 10:26+ **k 6:1** Ep 6:5+; Kol 3:22+; Tit 2:9+; 1Pe 2:18+ **l 6:2** Kol 4:1; Plm 16

Saveeṅ tiou tonene, upatoot tamtoghon pani, ve usaav ariana padi leso titaghoni.

Taghur lolood pa mbaliṅ to taan malep

³Saveeṅ to Tiina toit Yesu Kresi, ve ṅgar to tapatoot tamtoghon pani leso matadi ṅgal Maaron ve titaghon ataam toni, nene iuluul tamtoghon pa tineep pool. Tovenen ighaze ṅgeu eta ipul saveeṅ tonenen, ve igham saveeṅ ite pa tamtoghon, ⁴nene ye ipakur tau sorok pa ṅgar toni. Tamtoghon tovene, ṅgar toni ighazooṅ pa mbep eta maau. Ye inimale ṅgeu to moroghooṅ ighami le ṅgar toni iwaghamgham. Pasa, sawa isob, yesṅa tamtoghon tiwazoran di pa mos waaro pida to tamtoghon tigham ṅgar naol naol pani. Eemoghon saveeṅ tovene irau iuul ghiit maau. Nene igham tamtoghon tighur koi pa nditadi pida to ledi mbep katindi, ve atedi yabyab pa taudi, tiwakokan di, tipiyaav saveeṅ samsamia pa nditadi, ve tighita di tighaze yes samsamiadi.^m

⁵Ndiran tovene, moghon moghon tigham tamtoghon tiwazoran di. ṅgeu Samia ighamun ṅgar todi, ve isad saveeṅ onoon pa lolodi wa. Tauto matadi ṅgal tighaze uraat to patoṅaṅ tamtoghon pa Maaron ṅgar toni, nene ataam poia pa tiyou ledi mbep katindi.ⁿ

⁶Onoon, ighaze mataad ṅgal Maaron ve tataghon ṅgar toni, ve lolood poia pa sa nepooṅ to ye igham pait, nene ṅgar tovene iuul ghiit kat.^o

⁷Pasa, iit tawatag: Nditinaan tipoop ghiit nimaad ṅginiṅa. Ve sawa to tamaat ve tapul taan tonene, nene pale nimaad ṅginiṅa ve tala.^p

⁸Tovenen ighaze iit aad aniiṅ ve leed nonogiiṅa, nene lolood poia, ve tasaav taghaze: “Nene iraua.”^q

⁹Tamtoghon to ṅgar todi iyaryaṅ tighaze tinim mbaliṅ taudi, ṅgar todi tonowen inim liis padi, ve inim ataam pa tovaṅ naol tivot padi. Pasa, ighamun ṅgar todi ve ipazaagh di pa ghamuuṅ ṅgar samsamia naol. Yes tigham ṅgar to borouṅa, ve tiwaghamun taudi kat. Tovenen muri pale tisami ve tilaledi.^r

¹⁰Pasa, ṅgar to lolood pa yaam kat, nene inim pughu pa ṅgar samsamia naol naol. Ughita. Tamtoghon pida to tizuaria di kat pa ghamuuṅ ledi yaam tiina, tipul saveeṅ to iit taghur ila, ve tikaria taudi wa.^s

Paulus ipalot Timoti, leso iyoon ariana

¹¹Eemoghon Timoti, yom unum tamtoghon to Maaron wa. Tovenen uneep sagan pa ṅgar samsamia naol tonenen. Uzuaria ghom le uneep denjam kat ila Maaron mata, ve utaghon katin ṅgar toni, ukis ghurla tiom

m 6:4 Ga 1:6+; 1Tim 1:3+; 2Tim 2:23+; Tit 3:9 **n 6:5** Tit 1:11 **o 6:6** Pil 4:11+
p 6:7 Yop 1:21; Mbo 49:16+ **q 6:8** Np 30:8; Mt 6:25; Hib 13:5 **r 6:9** Np 28:22;
 Mt 13:22; Yems 5:1 **s 6:10** Igham 23:8; Mt 27:5; Ep 5:5

tunjia, uyoon ariana pa badoon patanjani, lolom pa tamtoghon ve ugham poian di, ve ugham pooi padi.^t

¹² Ghurla toit, nene mbep tau. Tovenen yom irau uparab ariana pani, ve uzuaria ghom le ugham nepoon to mataad iyaryaar. Matam ingal. Muun, yom umatughez maau, ve uvotia ghurla tiom ila ival tiina matadi. Sawa tonenen, Maaron ipoi ghom pa ugham nepoon tonenen.^u

¹³⁻¹⁴ Maaron, ye inim pughu pa mbep tisob to tineep matadi iyaryaar. Ve Yesu Krisi, ye imatughez maau, ve ivotia tau ighazoon ila Pontius Piladus mata. You nasaav ariana payom ila yesuru matadi tovene: Ugham ngar samia eta to irau igham tamtoghon tiyou avodi pa lupuun to Krisi malep. Tutuun to nasavia payom ne, matam kisini ve utaghoni kat le irau sawa to Tiina toit Yesu Krisi imuul inim, ve ipatoon tau ivot ighazoon.

¹⁵ Mulaan toni pale ivot pa sawa to Maaron tau ighuri.

Maaron toit, ye poia pughu.

Ye moghon to tapiri tiina kat, ve mbep tisob tineep ila samba.

Ye kinik tiina kat to injin kinik tisob, ve ilib pa ndimaronja tisob.^v

¹⁶ Ye moghon to irau imaat maau, ve inepneep ila nguruba tiina lolo. Injuruba tonowen, tapiri tiina. Tamtoghon eta irau igharui ne maau.

Tamtoghon eta ighita Maaron nagho sone.

Ve tamtoghon eta irau ighita katini maau.

Ye tapiri tiina kat, ve ighamgham pooz irau sawa isob.

Tauto tapait iza to aazne, ve itaghoni taghoni gha ila.

Onoon.^w

Saveen injarua yes mbaliin taudi

¹⁷ Yes to ledi mbaliin katindi to taan, usaav ariana padi ughaze tipakur taudi malep, ve tinumeer yaam ve mbep todi malep. Pasa, mbaliin todi tonowen, mbep tau maau. Ineep rismoghon, ve isob. Yes irau tinumeer Maaron moghon. Pasa, ye to ighamgham mbep popoia katindi pait, leso taneep pooi toman tiniid iza.^x

¹⁸ Ve usaav ariana padi pa titaghon ngar poia, ve tizuaria di le tiraua kat pa ghamuun uraat popoia to naol ne. Sawa isob, yes irau tisanan pa tiuul yes mbolaana toman lolodi poia.^y

¹⁹ Ighaze tigham tovene, nene imale tindou ledi mbaliin tau to pale iuul katin di izi ndug sambam. Ve yes pale tineep matadi iyaryaar le alok. Nepoon tonene, nene nepoon tau.^z

t 6:11 2Tim 2:22 u 6:12 1Kor 9:25+; 1Tim 1:18; 2Tim 4:7 v 6:15 1Tim 1:17;
 Syg 17:14, 19:16 w 6:16 Igham 33:20; Yo 1:18; 1Yo 4:12 x 6:17 Mbo 62:10; Lu 12:15+
 y 6:18 2Kor 9:6+; Ga 6:9+; Tit 3:14 z 6:19 Mt 6:19+; Lu 12:33

Timoti irau mata iŋgal uraat toni

²⁰O Timoti, saveeŋ onoon ve uraat, tauto ilat nimam wa. Matam iŋgali, ve uŋgin poiiani. Ve saveeŋ soroksorok to taan to le anoŋa maau, toman ŋgar kaarom to yes to tizorזור ghiit ne, yom uneep saguan pani. Onoon, ndiran tonowen tinumeer taudi tighaze ledi ŋgar tiina. Eemoghon maau.^a

²¹Ughita. Tamtoghon pida to tighur ila ndiran tonowen ŋgar todi ve titaghoni, yes tipul ghurla todi, ve tiyel pa ataam to Maaron wa.

Poia to Maaron iza tiam. Onoon.

a 6:20 1Tim 1:4, 4:6+; 2Tim 1:14, 2:14; Tit 1:9